

# BON DIA *Aruba*

Diasabra 31 di Mei 2014 [www.bondia.com](http://www.bondia.com) Email: [noticia@bondia.com](mailto:noticia@bondia.com) Tel: 582-7800 Fax: 582-7044 1,50 Florin



## Museo Carnavalesco lo bira un "must visit"

**SAN NICOLAS** -- Ex Greenhill Supermarket na San Nicolas lo bira e proximo Carnival Museum di Aruba. Esaki, lo bira un museo carnavalesco cu lo entretene y inspira tur cu bishita. Un proyecto, cu una bes cu e ta cla, lo ta na encargo di Minister di Cultura y lo ta un atraccion extra pa e turistanan y e comunidad di Aruba.  
Les a detayenan riba pagina A2

## Museo Carnavalesco lo bira un “must visit” pa tur bishitante

**ORANJESTAD – Ayera mainta a wordo anuncia cu ex Greenhill Supermarket na San Nicolas lo bira e proximo Carnival Museum di Aruba.**

Minister di turismo transporte y labor sr. Otmar Oduber y minister di asuntonan economico, energia y medio ambiente sr. Mike de Meza a hiba palabra.

E sitio aki ta bay bira un museo carnavalesco cu lo entretene y inspira tur cu bishita.

Segun sr. de Meza hunto cu su colega sr. Oduber a papia hopi tempo pa bin cu e proyecto aki, sr. Oduber su contribucion ta sumamente grandi pa cu cultura di Aruba, y tambe como un persona cu ta participa activamente na carnaval tur aña e tin su conocimiento ariba e proyecto aki. Ora esaki wordo reconstrui e ta bay den encargo di minister di cultura. E proyecto aki lo ta un empuhe grandi pa San Nicolas den forma di e economia cu nos ta estimulando actualmente sr. de Meza a bisa.

### **Embeyecemento San Nicolas**

Segun sr. Oduber a menciona

esaki ta forma parti di e embeyecemento di San Nicolas pa e bira e segundo pilar economico di e pais. E la uza ehempel di Joe Laveist Ballpark cu ya ta cubri casi mita cu yerba falso y tribuna cu ya a wordo drecha. Tambe e Carnival Village cu lo continua cu e di dos fase e aña aki. Un pa un cada un di e edificacionan aki nan turno lo yega pa wordo renoba, restaura of reconstrui completamente pa ora e proyectonan aki finalisa por duna turistanan un trip cultural rond Aruba na tur e localidatnan aki. Entre e proyecto aki tambe ta inclui e Carnaval street.

### **Festival cultural**

Tres aña pasa gabinete Mike Eman 1 a cumpra e compleho aki, anto destina pa aki bin un museo di Carnaval. Carnaval ya ta 60 aña na Aruba y pa e motibo aki kier a accentua e festival mas grandi di Aruba aki segun sr. De Meza. A scoge pa trece esaki den un museo pa nos bishitantenan y familiarnan por bishita esaki y siña mas di e festival cultural mas grandi di Aruba.

### **Proceso di construccion**

Sr. de Meza a sigui splica con contento e ta cu a yega un

otro fase pa cu esaki y PWC a haci entrega di e visibility rapport di e carnaval center aki oficialmente yama Aruba Culture Carnival Center (ACCC). Esaki lo bay pa Fondo Desaroyo Aruba (FDA) unda e fondonan ta aloca caba pa e reconstruccion di e compleho aki como cu e ta un edificio grandi di tres piso. Pronto ta spera cu e trabounan por tuma luga, mescos cu e Carnival village cu ta bay cuminsa pronto cu su di dos fase. Entre e edificacionan cu lo wordo renoba ta tambe e Nicolas Store unda ta bay pone e Community museo aden.

Pronto lo bini tambe e museo den e watertoren, cu lo wordo drecha y opera pa Web, Elmar, Utilities NV., Aruba Airports Authority y tambe Setar. tur esaki lo trece un atraccion extra pa e turistanan y e comunidad di Aruba. Unabes e construccion di e ACCC cuminsa e proyecto tin un duracion di 8 luna segun sr. de Meza a bisa. Prob-



ablemente e construccionnan lo cuminsa ya caba den juni of juli debi cu e rapport mester cana algun caminda prome cu por cuminsa cu e proyecto.

Den un otro edicion Bon Dia Aruba lo pone mas detaye tocante e edificacionan na San Nicolas cu ta inclui den e proyecto pa subi e calidad di San Nicolas. □